

Weckherlin, Georg Rodolf: Ode (1641)

1 Frisch auff/ jhr dapfere Soldaten/
2 Jhr/ die jhr noch mit Teutschem blut/
3 Jhr/ die jhr noch mit frühem muht
4 Belebet/ suchet grosse thaten!
5 Jhr Landsleut/ jhr Landsknecht frisch auff/
6 Das Land/ die Freyheit sich verlieret/
7 Wa jhr nicht muhtig schlaget drauff/
8 Vnd vberwindend triumfieret.

9 Der ist ein Teutscher wolgeboren/
10 Der von betrug vnd falschheit frey/
11 Hat weder redlichkeit noch trew/
12 Noch glauben/ noch freyheit verlohren:
13 Der ist ein teutscher ehren wehrt/
14 Der wacker/ hertzhafft/ vnverzaget/
15 Für die Freyheit mit seinem schwert
16 In die gröste gefahr sich waget.

17 Dan wan jhn schon die feind verwunden/
18 Vnd nemen jhm das leben hin/
19 Ist doch ruhm vnd ehr sein gewin/
20 Vnd Er ist gar nicht vberwunden:
21 Ein solcher tod ist jhm nicht schwer/
22 Weil sein gewissen jhn versüsset;
23 Vnd Er erwirbet lob vnd ehr/
24 In dem er sein blut so vergiesset.

25 Sein Nahm vnd ruhm allzeit erklingen
26 In allem land/ in jedem mund:
27 Sein leben durch den tod wird kund/
28 Weil sein lob die Nachkömling singen:
29 Die edle freyheit ist die frucht/
30 Die er dem Vatterland verlasset;

31 Da der hertzloß durch seine flucht
32 Wirt gantz verachtet vnd gehasset.

33 Also zu leben vnd zu sterben
34 Gilt dem redlichen Teutschen gleich:
35 Der Tod vnd Sig seind schön vnd reich/
36 Durch beed kan er sein hayl erwerben:
37 Hingegen fliehen allen danck
38 Die flüchtige vnd der verräther/
39 Vnd jhnen folget ein gestanck/
40 Weil sie verfluchte vbelthäter.

41 Wolan derhalb/ jhr wehrte Teutschen/
42 Mit Teutscher faust/ mit kühnem muht/
43 Dämpfet nu der Tyrannen wuht/
44 Zu brechet jhr joch/ band vnd beutschen:
45 Vnüberwindlich rühmet sie
46 Jhr titul/ torheit vnd stoltzieren:
47 Aber jhr Heer mit schlechter müh
48 Mag (vberwindlich) bald verlieren.

49 Ha! fallet in sie: jhre fahnen
50 Zittern auß forcht: Sie trennen sich/
51 Jhr böse sach helt nicht den stich/
52 Drumb zu der flucht sie sich schon mahnen:
53 Groß ist jhr heer; Klein ist jhr glaub/
54 Gut ist jhr Zeug/ böß jhr gewissen:
55 Frisch auff/ sie zittern wie das laub/
56 Vnd weren schon gern außgerissen.

57 Ha! schlaget auff Sie/ Liebe brüder/
58 Ist die müh groß/ so ist nicht schlecht
59 Der sig vnd beut: vnd wol vnd recht
60 Zuthun/ seind sie dan jhr viel müder:
61 So straff/ O Teutsches hertz vnd hand/

- 62 Nu die Tyrannen/ vnd die bösen;
63 Die Freyheit vnd das Vatterland
64 Must du auff dise weiß erlösen.

(Textopus: Ode. Abgerufen am 23.01.2026 von <https://www.textopus.de/poems/18999>)